

Aktiviti berkaitan perayaan Aidilfitri dibenarkan dengan syarat

Oleh Fahmy A Rosli - April 27, 2022 @ 4:58pm
fahmy.azril@bh.com.my



Menteri Kesihatan, Khairy Jamaluddin. - Foto NSTP

KUALA LUMPUR: Takbir Aidilfitri dibenarkan dilakukan di masjid dan surau, termasuk rumah ke rumah, tetapi perlu sentiasa memakai pelitup muka.

Itu antara protokol berkaitan sambutan Aidilfitri yang digariskan Kementerian Kesihatan (KKM) bagi memastikan Keluarga Malaysia menyambut perayaan itu dalam keadaan meriah dan selamat.

Menteri Kesihatan, Khairy Jamaluddin, berkata individu yang positif bagaimanapun dilarang menyertai aktiviti itu, termasuk menggalakkan hanya individu tanpa gejala dan lengkap vaksinasi untuk menyertainya.

"Protokol itu adalah sebagai panduan umum, namun ia tertakluk kepada ketetapan dan prosedur operasi standard (SOP) oleh pihak berkuasa agama negeri," katanya pada sidang media di Putrajaya hari ini.

Selain itu, protokol terbabit juga membenarkan solat sunat Aidilfitri di masjid atau surau dengan kapasiti 100 peratus.

Khairy berkata, semua jemaah perlu sentiasa memakai pelitup muka semasa berada dalam masjid atau surau, termasuk semasa sedang solat.

"Individu positif COVID-19 dilarang untuk menyertai dan individu bergejala tidak digalakkan untuk menyertai.

"Elakkan 3S, amalkan 3W dan galakkan berwuduk di rumah dengan membawa sejadah sendiri. Jemaah perlu masuk ikut giliran untuk mengelakkan kesesakan seterusnya bersurai dengan tenang," katanya.

Turut dibenarkan, program ziarah termasuk di tanah perkuburan tetapi perlu memakai pelitup muka dan individu positif COVID-19 tidak dibenarkan hadir.

Bagi program rumah terbuka sama ada di kawasan tertutup ataupun terbuka, Khairy berkata, mereka juga tertakluk kepada SOP dan larangan sama.

"Dibenarkan dengan syarat memakai pelitup muka, kes positif COVID-19 tidak dibenarkan hadir dalam majlis dan individu bergejala tidak digalakkan untuk menyertai," katanya.